

**BOSNA I HERCEGOVINA  
FEDERACIJA BOSNE I HERCEGOVINE  
VLADA**

**PRIJEDLOG**

**ODLUKA  
O ALOKACIJI OBAVEZA PO KREDITU KUVAJTSKOG FONDA ZA RAZVOJ 535-  
PROJEKT ČETIRI CESTE I MOST MUSALA NA FEDERACIJU BOSNE I  
HERCEGOVINE**

**Sarajevo, decembar 2014. godine**

Na osnovu člana 40. stav 5. i člana 37. stav 3. Zakona o dugu, zaduživanju i garancijama u Federaciji Bosne i Hercegovine („Službene novine Federacije BiH“, br. 86/07, 24/09 i 44/10), Predstavnički dom Parlamenta Federacije Bosne i Hercegovine na \_\_\_\_\_ sjednici održanoj \_\_\_\_\_ godine i Doma naroda Parlamenta Federacije Bosne i Hercegovine na \_\_\_\_\_ sjednici održanoj \_\_\_\_\_ godine, d o n o s i

**O D L U K U**  
**O ALOKACIJI OBAVEZA PO KREDITU KUVAJTSKOG FONDA ZA RAZVOJ 535-  
PROJEKT ČETIRI CESTE I MOST MUSALA NA FEDERACIJU BOSNE I  
HERCEGOVINE**

**I.**

Kredit Kuvajtskog fonda za razvoj (u daljem tekstu: Kuvajtski fond) broj: 535-Projekt četiri ceste i most Musala u iznosu 3.000.000,00 KWD (kuvajtskih dinara), u cjelosti se alokira na Federaciju Bosne i Hercegovine.

**II.**

Razvojna banka Federacije Bosne i Hercegovine će povući tužbe protiv Grada Mostara i prijedloge za izvršenja radi naplate dospjelih potraživanja po kreditu iz tačke I. ove odluke.

**III.**

Za realizaciju ove odluke zadužuju se Federalno ministarstvo finansija-Federalno ministarstvo financija, Razvojna banka Federacije Bosne i Hercegovine, svako u okviru svojih nadležnosti.

**IV.**

Ova odluka stupa na snagu narednog dana od dana objavljivanja u „Službenim novinama Federacije BiH“.

# **O B R A Z L O Ž E N J E**

## **I. PRAVNI OSNOV**

Pravni osnov za donošenje ove odluke sadržan je u članu 40. stav 4. i 5. Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br: 86/07, 24/09 i 44/10), koji propisuje pitanja vanjskog zaduženja Federacije i procedure za zajmove, kao i da Vlada Federacije Bosne i Hercegovine nakon prihvatanja Nacrta kreditnog sporazuma i utvrđivanja Prijedloga odluke, istu dostavlja Parlamentu Federacije BiH na usvajanje. Također, članom 37. stav 3. ovog zakona propisano je da je zaduženje kantona, gradova i općina na osnovu vanjskog duga, zajedno sa pratećom dokumentacijom, predmet prethodne saglasnosti Parlamenta Federacije Bosne i Hercegovine.

## **II. RAZLOZI ZA DONOŠENJE**

Federacija Bosne i Hercegovine i Kuvajtski fond za razvoj, zaključili su 13.3.1998. godine, Sporazum o zajmu broj 535, koji je namijenjen rekonstrukciji četiri ceste i mosta Musala na području Grada Mostara. Iznos odobrenog kredita je 3.000.000 KD (kuvajtskih dinara) što je protuvrijednost od 15.688.500,00 KM (prema kursu Centralne banke BiH na dan 30.09.2014.godine, 1 KWD = 5,2295 KM). Kredit je odobren na rok od 25 godina, sa grace periodom od 6 godina. Otplata glavnice je počela 1.9.2003. godine, dok će se ukupan kredit izmiriti do 1.9.2023. godine. Kamata je fiksna i iznosi 2% godišnje.

Zaključno sa 30.09.2014. godine (prema kursu Centralne banke BiH na dan 30.09.2014.godine, 1 KWD = 5,2295 KM), ukupno je otplaćeno 1.650.000 KWD glavnice, što je protuvrijednost od 8.628.675 KM; 611.879 KWD kamate, što je protuvrijednost od 3.199.821 KM. Stanje duga (preostali iznos neplaćene glavnice) na dan 30.09.2014. godine, iznosi 1.350.000 KWD, odnosno 7.059.825 KM koje je potrebno otplatiti do 01.09.2023. godine u skladu sa planom otplate iz Sporazuma o zajmu broj 535.

Kredit je realiziran putem Razvojne banke Federacije BiH, koja je u ime Federacije BiH zaključila kreditne ugovore sa tadašnjim općinama Mostara: Sjever, Stari Grad i Jugoistok.

Donošenjem Statuta Grada Mostara 15.3.2004. godine, Grad Mostar je postao jedinstvena teritorijalna i administrativna cjelina, u čiji sastav su ušle i općine koje su dobile kredit Kuvajtskog fonda putem Razvojne banke Federacije BiH.

Zbog neriješene političke situacije u kojoj se od početka formiranja nalazi Gradska uprava Grada Mostara, kredit Kuvajtskog fonda zaključen sa tri bivše općine sa bošnjačkom većinom nije prihvaćen od strane nove Gradske uprave Mostara, tako da je Razvojna banka pred nadležnim sudovima podigla ukupno 4 tužbena zahtjeva protiv Grada Mostara u cilju naplate potraživanja po kreditima datim bivšim općinama Sjever, Stari Grad i Jugoistok.

Pozivajući se na trenutni politički status Grada Mostara, a uzimajući u obzir tešku finansijsku situaciju u kojoj se Uprava Grada nalazi, Grad Mostar se više puta obraćao na adrese Vlade Federacije BiH, Federalnog ministarstva finansija i Visokog predstavnika za BiH sa zahtjevom za pružanje pomoći u rješavanju problematike kredita Kuvajtskog fonda koji znatno opterećuje budžet zbog tereta kreditnih obaveza

kao i već presuđenih pravosnažnih presuda za glavnice, kamate i zatezne kamate koje Grad Mostar nije u stanju izmiriti.

Alociranjem kredita Kuvajtskog fonda na Federaciju BiH riješilo bi se opterećenje koje Kuvajtski kredit predstavlja za bolje funkcionisanje administracije Gradske uprave Mostara dok bi se istovremeno oslobodila budžetska sredstva za realizaciju novih kapitalnih projekata kojim je ambiciozno pristupila Gradska uprava za izvršavanje projekata od krucijalne važnosti za Grad. Također bi bilo riješeno opterećenje koje pravosnažne sudske presude donesene po tužbama Razvojne banke Federacije imaju na funkcionisanje Grada Mostara u vidu prijetnji blokadom budžeta Grada i svih računa kojim upravlja.

### **III. OBRAZLOŽENJE POJEDINIH TAČAKA**

**Tačkom I.** definira se alokacija kredita Kuvajtskog fonda na Federaciju BiH.

**Tačkom II.** se zadužuje Razvojna banka FBiH da povuče tužbene zahtjeve protiv Grada Mostara

**Tačka III.** definira da se za realizaciju ove odluke zadužuju Federalno ministarstvo finansija - Federalno ministarstvo financija, Razvojna banka Federacije BiH i Grad Mostar, svako u okviru svoje nadležnosti.

**Tačka IV.** propisuje stupanje na snagu ove odluke.